
KLOAREK KOAT AR RANNOU

HA

PEÑN-HEREZ KERZANTON.

War don : *Kurunen avour ha perlez ann Itron Varia Remengol.*

Karantez ha glac'hар !!!

I

Tud iaouank a Vreiz-Izel , didoztait da glevet
 Ar recit euz va daëlon ha va foaniou kalet :
 Me so eur c'hloarek iouank a eskopti Kemper
 Am boa choazet eur vestrez enn eskopti Treguer.



E c'harz ar mor oun ganet e bro sant Gwenole ,
 Ha biskoaz nemet glac'hар n'em euz bet em bue :
Glac'hар ha guir garantez . setu va flaneden ,
 Planeden rust ha kalet da heulia penn-da-benn.

Pa oan em bugaleach va mamm baour aliez
 A lavare d'in : « Va mab , kar ha ped ar Werc'hez ,
 » Ped anez-hi , va mabik , ped Gwerc'hez Remengol ,
 » Mar he fedez a galon , biken ne di da goll . »

Patronez va mamm dener , Gwerc'hez vad Remengol ,
 Pet gweach oc'h euz-hu miret na dounn me eat da goll ! ...
 Ho pedet am euz bepret ... breman arok mervel ,
 E kaninn ho meuleudi d'am breudeur Breiz-Izel .

II

Pa gimiadiz dioc'h va zud , pa ziz pell eus ar ger ,
 Evit mont war ar studi e skołach Landreguer ,
 N'em boa nemet pemzek vloa , me a wele dourek ,
 Rag evidon ne voa ken , allaz , a eurustet ! !

K13

O tostaat oe'h Landreguer e kaviz eur plac'hik ,
Koant vel eun elik Doue , he hano oa Metik ,
D'ar gouent e zea ive , evel d'on d'ar studi ,
He c'halonik oa mantrret kement ha va hini.

» Salud deoc'h , plac'hik iaouank , a lavariz dez-hi ,
» Evel d'oun oc'h ankeniet o kuitat tud ho ti ;
» Ho tornik flour em dornik lakit gant karantez ,
» Hag e vezimp eurussoc'h o wela assamblez . »

Ar plac'hik a lavaraz : « O kloarek Gwenole ,
» Pedomp Doue aliez ann eil 'vit eguale ;
» Er joa koulz hag en anken d'ale'hit sonj a Vetik ,
» Euz a vreman da viken e vo ho[m]estrezik . »
« O Metik , va e'harante , rozen gaér Breiz-Izel !
» War ho mignon Gwenole tolit breman eur zell ,
» Eur zell digant ho lagad a rai va eurustet
» Keit a ma lezo Doue ac'hanon war ar bed . »

Erru e kear Landreguer , erru e penn hon hent ,
Me oe kasset d'ar skolach , ha Metik d'ar gouent ;
Ann disparti oe kalet , e'buero hag ankeniuz ;
Anu eurustet , er bed man siouas ! n'eo ket padouz ! ...

'Tre ma chomiz er skolach , skeuden dous Metik kez
Enn deiz , en noz dirazon a dueu aliez ,
Neuze e peden Doue ha Sent koz Breiz-Izel
'Vit ma vije he bue laouen , euruz , santed .

III

Pa oe echu va studi ez iz da Remengol
Da bedi c'hoaz evit-hi Gwerc'hez vad *Remed-oll* ;
Seiz tro a riz d'ann aoter , devez ar padon braz
Ha seized tro d'ann Iliz sakr war benn va daoulin noaz .

Goude ann oseren bred , o pebeuz Jevenez ! ...
Er vered gant he mamm ger , e velis Metik kez :
Laouen oa evel ann deiz ha koant evel al loar ,
Biskoaz pen-herez ker koant n'euz bet war ann douar .

Luguerni a re he zall , he diou chod gwen ha ru ,
He ginou , vel eur rosen , he bleo , he lagad du ,
Eur groas aour en he e'herc'hen , he e'hoef dantelezet ,
Lavaret 'vije eun eal euz ann en diskennet .

- * O ! pebeus joa evidomp , va c'hloarek Gwenole ,
- * En em gaout e Remengol , deiz pardon Mamm Doue ,
- * Mamm ann oll dud ankeniet , Gwenole , ma migoun ,
- * Evidout e peb amzer , he fediz a galon .

- * Metik koant , setu aman , setu ar voalen aour
- * A roaz d'in , arog meravel , Annaïk , va mamm baour ,
- * Doug anez-hi war da viz , kemer-hi digan-en ,
- * Me dou war goalen va mamm d'az karet da viken .

- * Ar groaz aour zo em c'herc'hen a vo did , Gwenole ,
- * Eur guchen euz va bleo du a roan did ive ;
- * War ar groaz se e touan ha dirag ar Were'hez
- * E vi karet gant Metik 'tre ma vo e buez .

Ha daoulinet en Iliz , hon euz gred hor peden ,
Ha roet evit offrans , eur c'houriz koar melen ,
Binniget hor medalen , poket d'ar relegou ,
Da relegou Sent Breiz , karet gant hon tadou .

Goude hon eus baleet hon daou dre Vreiz-Izel ,
Ha guelet kalz 'ilizou , kalz a douriou huel ,
Abbat Landevennek ha mor Douarnenez ,
Lec'h ma oe beuzet kear Is hag ar brincez Ahez .

Gwelet hon deus Mene-Hom , hag iliz veur Kemper ,
Mene-Bre , iliz Bulat hag hini Landreguer ,
Kastel Brest , Sant-Jan-ar-Biz , iliz Salaün ar foll ,
Ha kaëra tour zo er bed , tour huel Kastel-Pol .

Gwelet hon euz Ker-Ahez , Kemperle , Pont-n'Abat ,
Fouenan , bro ar merc'hed koant , Gwengamp hag Huelgoad
Montroulez ha Lann-Huon , Krozon ha Lez-n-even ,
Kallak , bro ar gourinou , Kastel-lin , Rosporden .

Klevet on euz o krozal ar mor e beg ar Raz ,
Biskoaz den n'hen tremenaz eb santout aon pe c'hlaz ,
Bet omp en enez Sizun , en Heussa , Molenez ,
En enez Vaz , er Iodet , ive er sez enez .

Eur bloavez omp bet eurus evel daou eal Doue ,
E pep lec'h , pa hor guelet , ann holl a lavare :
* Setu kloarek ar Rannou , soun evel eun derven ,
* Setu Metik , he vestrez , fresq evel eur rozen .

IV

Devez pardon sant Herbot , e kleviz eur c'belou ,
En euz heuzet vo c'halon , en eur mor à zaëlou ,
Gant he zad ha gant he mamm d'amm mestrezik Metik.
Ez oa choazet da bried eur pagan pinvidik.

Ar pagan ze oa diot , hep furnez hep skiant ,
Ne gare war ann douar nemet ar gwin-ardant ,
Metik paour pa er gwele a grene gant enkrez ,
Hogen , he zud oa dallet , alias ! gant ann danvez ! ...

Mont a riz primm d'he gwelet neuze da Gerzanton ,
Dre ma tostaen em c'hreiz , e kreue va c'halon ,
War dachen ar bourg o sôn e oa ar biniou ,
Tud ann eured ha Metik beuzet en he daëlou .

Metik , a dreuz he daëlon , a reaz ouz-in eur sel
En eur lavaret : « Kouraj , Kouraj . mignon fidel !
Monet a ra en ilis , lavarat 'ra d'ar belek :
« Gwenole eo a garan , hag hen vo va fried ! ...

Koueza reaz d'ann douar , raktal ar benn-herez ,
Ha douget e oe dioc'h-tu euz ann ilis er mez ;
Dispak he c'hoef , he dillat , ha dispak he bleo ;
Seblantout a re beza eun elik paour maro .

Mantret holl gant ar glac'hар e koueziz dann daoulin ,
En eur grial : « O Metik , sell a druez ouzin ! ... »
Pokat a riz d'he dornik , d'he diou chod , d'he c'herec'hén ;
O Metik ! Metik ! Metik ! Te p'hini a garien ! ...

Ann disesper en dro din , evel eur vantel blom ,
A gassaz pell a c'hanon , pell war zu Mene-Hom...
Va skiant a so kollet , va c'halon a so ien...
O Metik ! Metik ! Metik ! Te p'hini a garien ! ...

Eiz de goude , asezet e kreiz koat ar Rannou ,
War va diou chod e rede diou feunteun a zaëlou...
Pa glevis e Remengol o sôn ann anter-noz
E lavaris esklamet : « Va Doué , deo:h bennoz ! ...

« O Gwere'hez vad Remengol , sellit oc'h va glac'hар ,
» Aman oun deut da verval bremar war ho touar ,
» Varc'hoaz pa zavo ann heol arc'hantet en envo
» Dindan an derven goz ma , me vo kavet maro !!!...

» O Metik , va dousik koant , te p'hini a garien ,
» Kenavo 'lavaran did er bed ma da viken !
» Gant ar maro unanet , ni c'hoaz en eum garo ,
» Kenavo er baradoz , kenavo , kenavo !!!...

V

Ann de varlerc'h , da zao heol , eun durzunel hep par
A hirvoude en derven he c'blemou a c'hlac'har ;
Ar c'hloarek a ioa maro , maro gant ann anken ,
En eur lavaret : • *Metik te p'hini a garien !*

Ar c'hloarek paour a starde , c'hoaz war he vuzellou ,
Kroas aour ha bleo du Metik , glebiet gant he zaëlou ;
War ann derven'n'doa skrivet hano he garante ,
Ha diou galon unanet treuzet gant eur c'hlaze .

Kasset eo bet ar c'hloarek da vered Remengol ,
Ha s̄ebeliet e disheol iliz sakr *Remed-oll* ,
Iliz Patronez he vamm en deuz bet ken karet ! ...
Tud iaouank a Vreiz-Izel , pedit 'vit-han bepret.

Setu eta Gwenole en he vele douar !!! ...
Eur miz goude oe klevet huanadou glac'har ...
Eur plac'hik gwisket e dù , e bered Remengol
Deut di da bedi Doue ha Gwere'hez Remed-holl .

O tremen dre ar vered , velaz war eur men be
Skrivet neve flamm hano he mignon Gwenole .
Epad ann noz daoülinet , Metik wele dourek ,
Ha d'ar men be e poke , e poke kalonek .

» O Gwenole , eme-z-i , setu te o reposz
» E douar sakr Remengol ez out deut d'am gortoz ,
» Mes kent ma tarzo aun de , o va muia karet ,
» Er be man , dre zorn Doue , ni vezou unanet !!! ...

Da zao-heol eur belek koz 'vont , da bedi Doue
He c'havaz anter-varo , gourveet war ar mén-be ,
Rei a raz d'ar plac'hik paour absolven ha pardon ,
Metik a varvaz laouen , raktal , gant rann-galon ! ...

ENN eur vogeden ezanz ene gwen Metik kez ,
'Vel eur goulmik , a nijaz d'ann ên gant ann elez ;
Euz a varados Doue eur goabren are'hantet ,
War tour Iliz Remengol , neuze , zo diskennet .

War ar goabren ar Were'hez ha Sent koz Breiz-Izel ,
'Deuz kurunet Gwenole hag he vestrez santel ,
Barzet ann amzer gweeball , drant , war ho zellenou
Da Zoue , e brezounek , a gane ho gwersiou.

Seheliet e korf Metik , kichen korf Gwenole ,
Ar maro 'n deuz unanet ann eil gant egile...
Eur c'hoarek karantezuz 'n deuz war ho be skrivet
Ar c'homzou truezuz man , gant he zaëlu mesket :

« *Aman e repos , e peoc'h , kloarek koat ar Rannou*
» *Den a feiz hag a galon , den a garie he vro ;*
» *En e gichen eo kousket penn-herez Kersanton ,*
» *Metik , ann elik Doue , maro gant rann-galon !!!... »*

O gwerc'hez vad Remengol , setu ho taou vuguel
Kousket e tal hoe'h Iliz ha dindan hoe'h askel ,
'Vel eur Vamm garantezus war gavel he mabik ,
C'hui dolo evez war be Gwenole ha Metik !!!... .

Kleier , ograou Remengol , truezuz c'hui zono ,
Barzet ha pelerinet , daëlou c'hui a skuillo ,
War be Metik , Gwenole , pa rafet hio peden ,
Eur beden a garantez ha karget a anken !....

Bevit e doujanz Doue , tud iaouank Breiz-Izel ,
Pedit Gwerc'hez Remengol evit ma viot santel ;
Sonjit ive e Metik , sonjit e Gwenole ,
Bezit evel d'ho fidél ann eil d'egile.

Koat ar Rannou , (Rann , Rannou , chants , séries) , bois des chants ou des séries. Koat braz e dero , a zo e kichen , ha dar zao heol da ilis Remengol. Ann Drouizet , heleien ar Vrettonnet , gwechal c'hoas difeiz , a droc'he , bep bloaz , gant eur gontel aour , e koat ar Rannou , eul louzaouen , hanvet huellvar , p'hini a zao war ann dero.

Barz , barzel , (barde , poète). Bep bloaz ive enem gave e koat ar Rannou hag e Rumengoulou , hirio hanvet Remengol , Barzet ann Arvor. Ar re ma a oa tud a skiant pere a gane gwersiou great gant ho , war ann traou kaer erruet er vro , kana a rent iive meuleudi Teutatès , Doue faoz , p'hini a oa enoret ell eac'h e ma brema iliz Remengol. D'ann hini vije hanvet

Barz e roer eur gurunen dero hag eun delen aour, war p'hini
ar Barz a gane he soniou.

Gwenklan, Marzin, Taljezin, a oa barzet e Breiz-Izel kent
m'a teuaz en-hi ar feiz kristen. — Brema zo c'hoaz e Breiz
kalz Barzet, pere laka ho studi hag ho foan evit kenderc'hel
en hon touez ar feiz ha iez hor bro. Er pen kenta eus ar barzet
e ma ann aoutronez Kermarker, barz Breiz; ann abad Herri,
barz ann Aviel; Troude, barz ar vogaligou; Kemar, person
ha barz sant Laurans; ar Iann, barz Koat-ann-Noz; Milin,
barz Laouenan Breiz; Rannou, barz Roc'h-Allaz; Joubiou,
vikel vras a eskopti Gwenet, barz sant Gwen-Eal; ann abad
Klec'h, barz Rungolven; Kaourintin Thomas, barz ann
Tour-Tan; Prosper Proux, barz Kerne; ann Hegarad, barz
Plouek; I.-P.-M. ar Skour, barz Itron-Varia Remengol; F.-
M. ann Huel, barz Ker-ar-Born; Olier Souvestr, barz Plouian;
ann abad Poullaouek, kure Landevennek, barz sant Gwenole;
Karis, person Plougras, barz Mene-Bre; Guernisson, barz
Keravel, ha kalz a re all, pere o deuz gret eun niver bras a
werziou ha soniou kaer.


- « Kanit anez ho, Breiziz, rag beza int gwerzioù
- « Gret gant skiant ha kalon ha gant gwel vad komzou.
- « Gret int e brezounek mad, nan e koz vrezounek,
- « Evel ar re zo kalz re e brezounek-gallek. »

Barzet ha pelerinet, kanit gwerzioù santed,
Kanit gloar ha meuleudi da vamm tud Breiz-Izel,
Ho Mamm hag ho Patrones. Rouanes ar bed oll,
Mamm ann dod paour, ankeniet, *Gwerc'hez vad Remengol.*

I.-P.-M. AR SKOUR,

Barz Itron-Varia Remengol.

PROPRIÉTÉ :



ANN HINI A GARAN

War eun ton neve.

Ann hini a garan 'zo koant evel ann heol,
Karantezuz evel Gwerc'hez vad Remengol.

Doue Sent Breiz-Izel , Doue va zadou koz ,
D'ann hini a garan roit bepret ho pennoz.

Ann hini a garan 'zo dous evel al louar ,
En noz pa sklerijen bugale ann douar.

Doue Sent Breiz-Izel , etc.

Ann hini a garan 'zo vel ann alc'houeder
D'am c'halon paour e kan soniou , gwersiou tener ,
Doue Sent Breiz-Izel , etc.

Ann hini a garan 'zo vel ann durzunel ,
Pa ve maro he far , nem doll da verval.

Doue Sent Breiz-Izel , etc.

Ann hini a garan 'zo eun elik Doue ,
Eun elik dous a ra joaustet va bue.

Doue Sent Breiz-Izel , etc.

Ann hini a garan a zo dous he hano ,
Evel ar mel eo mad , koant evel ar bleunio.

Doue Sent Breiz-Izel , etc.

Ann hini a garan em e'halon a chomo ,
'Tre ma vin e bue , ha goude va maro.

Doue Sent Breiz-Izel , etc.

Ann hini a garan gane-me en disheol ,
A reposo eun deiz e hered Remengol.

Doue Sent Breiz-Izel , etc.

Ann hini a garan e palès ann Drindet ,
Gane-me da viken a vo karet , karet.

Doue Sent Breiz-Izel , Doue va zadou koz ,
D'ann hini a garan roit bepret ho pennoz.

I.-P.-M. AR SKOUR ,

Barz Itron-Varia Remengol.

